



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim


ig tiryimyim@aolima

yt tir yimyim

TAPAK 3

2024 Russian elections nung Vladimir Putin tokteptsü

ED aser CBI BJP atema inyaksangshir: Kcharge



VOL. XXI NO. 30 (ADOK 30) DIMAPUR SANGTENNÜ (TUESDAY) YIMPOKSÜI (NOVEMBER) 07, 2023 ₹ 5.00

Tanü Mizoram assembly elections agitsü Nagaland nung ULBs election yakta agitsü

Aizawl, November 6, 2023 (Agencies): Mongulbarnü Mizoram nung assembly election agitsü atema maparen ajak renemogo ta Hombarnü ketdangsürtemi ashi.

Mizoram nung voters lakh 8.57 temai candidate 174 tia yanglutsüsü.

November 7, 2023 anepdang 7:00 ako nungi polling tenzüksü aser nikongdang 4:00 ako nung tembangtsü, ta Chief Electoral Officer (CEO) Madhup Vyas-i ashi.

Mizoram nung polling stations 1,276 nung voting maparen tenzüksü aser iba nung remote polling stations 149 dena lir. Inter-state aser international borders anasa aliba voting centres 30 tashi 'critical' aser 'vulnerable' ta sangdongogo ta ketdangsür kati ashi.

India nung election tiptema agibaji Mizoram nung lir aser ibaji meraksatsü imlar ta CEO Vyas-i ashi.

Züngsem 40 agi akümba Mizoram assembly polling atema Myanmar den international border kilometre 510 aser Bangladesh den kilometre 318 shibangogo.

Assam Rifles-i Myanmar arrtsü anüker aser külen BSF-i Bangladesh den international border anüker.

Maneni, Assam, Manipur aser Tripura den inter-state boundaries ajak shibangogo.

"Election ketdangsürtemi EVMs bener pei pei booths

tongogo. Onok ket nung EVMs peria dang lir aser timtem anepalutsü atema engineers lir" ta Vyas-isa ashi.

Mizoram election atema police aser Central Armed Police Forces (CAPF) 3,000 shi mapa lemzüksüogo.

Taküm election nung tetsür candidate 18 dena nisung ajak agi 174 lir. Mizo National Front (MNF), opposition party Zoram People's Movement (ZPM) aser Congress ajanga menden 40 prong nung candidate toktepdaksür aser külen BJP-i menden 23 aser AAP-i menden 4 nung tokteper. Ano candidate 27-i independents ama tokteper.

Mizoram Assembly elections atema designated facilitation centers nung home voting ajanga votes 2,058 aser postal ballots ajanga vote 7,497 enoktsüogo, ta Mizoram CEO office-i metetdaksü.

Honibar nikongdang 5:00 ako tashi nung home voting aser postal ballots ajanga votes 9,555 enoktsüogo ta ketdangsür kati ashi.

Mizoram nung voters ji tebur 4,13,064 aser tetsür 4,39,028 lir. Arishi küm 18-19 tsingda voters 50,611 lir aser parnoki tang mezüing atema votes enoktsütsü.

Ano, Mizoram nung arishi küm 80 ser tema voters 8,490 lir ta Chief Electoral Officer's office ajanga metetdaksüogo.

Thorang (ST) Assembly constituency kübok Thelep polling station nungbo voters 26 dang lir ta parnokisa ashi.



November 6, 2023 nü Capital Convention Centre nung Select Committee to Examine the Nagaland Municipal (Bill) 2023 züngsemtemi osangbener den jembidang agiba noksa angur.

Dimapur, November 6, 2023

(TYO): Sorkar aser lisopur teloktemi Municipal Bill tasenba agizükogo aser tetsür nem shilem lemzüksü ULBs elections agitsü ta Nagaland Deputy Chief Minister, T R Zeliang-i ashi.

November 6, 2023 nü Capital Convention Centre, Kohima nung Nagaland Municipal (Bill) 2023 dak sendakba senden amendang iba lemtet agi ta pai ashi.

Tanü lemtet agiba sülen Assembly nung Bill tasen agizüker ozüing ka akümtsüla, iba atema Nagaland Governor-i November 9 nü NLA emergent session ka ayongogo ta TR

Zeliang-isa ashi.

Iba senden ya Deputy Chief Minister aser Select Committee to Examine the Nagaland Municipal (Bill) 2023 Convenor TR Zeliang mender ser amen.

Senden nung Select Committee züngsemtem- Rural Development and SIRD Minister Metsubo Jamir; Power and Parliamentary Affairs Minister KG Kenye aser Urban Development and Municipal Affairs Advisor Zhaleo Rio nunger aden.

Parnok den Central Nagaland Tribes Council (CNTC), Eastern Nagaland People's Organisation (ENPO) aser

Tenyimi Union Nagaland (TUN) nungi teshimtet nübotem den Chief Secretary, J Alam, IAS aden.

Nagaland Municipal (Bill) 2023 agizükba sülen Urban Local Bodies elections yakta agitsü ta Deputy CM TR Zeliang-i ashi.

ULB elections ji tetsür nem 33% lemzüksü agitsü saka ULBs nung tetsür nem chairperson mapa lemzüksüba agientsü, ta pai ashi.

Nagaland nung lisopurtemi dang ULB elections nung tokteptsü akok aser land & properties nung tax arlla agientsü, ta TR Zeliang-isa ashi.

CANSSEA-i AISGEF pusema nungiter

Dimapur, November 6, 2023 (TYO): Confederation of All Nagaland State Services Employees Association (CANSSEA) sanen luden züngsemtemi All India State Government Employees Federation (AISGEF) ajanga ayongba sentong nung shilem agiogo.

November 2, 2023 nü Ramlila Maidan, New Delhi nung agiba sentong nung takhangba onük 7 renem, ta CANSSEA Press & Information secy Siewatho S Nyusou-i ashi.

AISGEF ajanga ayongba senden nun sorkar dang PFRDA Act aser NPS agientsü takhangba agitsü. Parnokisa Health, Education & Postal GDS dena contractual/ outsourced/ daily waged employees ajak regularized asütsü takhangba agitsütsü lemtet.

Central/State Government Departments & PSUs nung mapa tazüngtem nung nübo shimoktsü aser PSUs privatisation/

corporatisation masütsü aser sorkar department tem nübo majemtsü atema senden nungsa lemtet.

Senden nungsa trade union rights agütsütsü aser NFPE, AIPEU -Class III, ISROSA derecognition order meyipa repringshitsü aser National Education Programe agientsü atema takhangba agütsütsü lemtet.

Parnokisa VIII Central Pay Commission tentettsü aser ita 18 indang DA/DR aser DA/DR arrears yua aliba agütsütsü takhangba agütsütsü telemtetba agi.

Compassionate employment Assistance scheme nung tenokdangba agüja aliba ajak agientsü atema parnokisa takhangba agitsü.

AISGEF, CCGEW, AISGPF, STFI aser NCCPA ajanga inyakba maparen ajak nung onokia pusema nungitsü lemtetogo ta CANSSEA sangdong nungsa shia lir.

Chakka Bandh anentsü asoshi sorkari tekaraba nung sen agüjang: OKM

Mokokchung, November 6 (TYO): All Commercial Vehicles Owners Association-i (ACVOA) November 3, 2023 nungi Chakka Bandh ayonga agiba ya Nagaland Legislative Assembly (NLA) election 2023 agidang mapa inyakba asoshi taa mapang shitak nung magütsüba ajanga lir ta Ongpangkong Kaketshir Mungdang (OKM)-i ashi.

ACVOA-i kanga dang tim nung noktakogo, aji asünung Nagaland sorkari tekaraba nung

parnok (ACVOA) nem tagütsütsü aliba sen agütsütsüla ta OKM Tir Limatongzuk Jamir aser Tongti Zülur Sungkumjang Kichu nati sangdong ka ajanga sorkar dang metetdaksüogo.

Chakka Bandh ajanga district 6 nung aliba nüburtem kanga dang timtemtepdagi, anungji sorkari ibaji angatettsüla. Nüburtem timtem majurutsüa tekaratiba nung ACVOA-i parnoki inyakba asoshi tangutsü aliba sen meshibaji agütsütsüla

ta OKM-i ashi.

OKM-isa nüburtemi tamang katettsüsa iba sen ya kechiba menua magütsütsüsa aküm ibaji bushitsüingdangba telok ka tenteter bushitsü aser ibaji ajanga mapa inyakba ajakji tekaraba nung tatembang kati arutsü nüngdaker ta metetdaksüogo.

Chakka Bandh ajanga timtem tuluba majurutsüsa state sorkari tekaratiba nung teinyaktsü inyaka tembangtsü kanga dang tongtipang ta OKM-ia metetdaksü.

Mkg fuel outlet nungi totzü telatet dang angutsü

Mokokchung, November 6, 2023 (TYO): Mokokchung jila aser temeket nung aliba totzü ayokdak (fuel outlet) ajak nung gari tila pur nem totzü litre metsü (20) aser tulu litre semer (30) dak tali magütsütsü asoshi Mokokchung Deputy Commissioner, Thsuvisie Phoji NCS-i totzü ayokdak ajak nem ozüing agütsüogo.

Iba tetuyuba ya talisa All-Commercial Vehicle Owners Association (ACVOA)-i

November 3, 2023 nungi 'Chakka Bandh' ayongba ajanga totzü agi anüngakong masütsü asoshi lir.

Osang tejangja ka magütsü tashi gari totzü tanki nung shioktsüba dak alaka shingaiia jerry can, container mesüra yamala mesükba kecha nung totzü talila magütsütsü asoshi Mokokchung DC-isa metetdaksüogo.

Ao Senden-i ACVOA pusemer 2023 Nagaland Legislative

Assembly election nung ACVOA-i mapa inyakba sen magütsüba atema ayongba Chakka Bandh pusema nungiter ta Ao Senden-i metetdaksüogo.

Nagaland sorkari tekaratiba nung All Commercial Vehicle Owners Association (ACVOA) nem agütsütsü aliba senotsü agütsütsü ayongzüker ta Ao Senden Tatong Tir I. Imkong Jamir aser Tongti Tezülur Imtipokyim nati sangdong ka nung ashi.

Mokokchung District GB Association aser Tuli temeket alir GB's-tem telongjem senden aka



Mokokchung District GB Association aser Tuli temeket alir GB-tem telongjem senden mener kelen parnok külemi tangokba noksa angur.

Mokokchung, November/ Yimpoksüi 06(TYO) : November 4 nü Tuli town nung Mokokchung District GB Association aser Tuli temeket nung aliba GB-tem tsüingda shisalemsatepa ajungshitepba telongjem senden ka menogo.

Iba senden nung Mokokchung District GB Association nungi Tir Wb. Along Jamir, tongti zülur Wb. Imlitemü, sen-otsü-zülur Wb. Temjen aser Ongpangkong area GB tongti zülur Wb. Merang par pezü lenisüba nung aser Tuli temeket len nungi yimtsüng 16 nungi Langpangkong GB-tem aser aser Head GB Tuli ta dena liasü.

Telok ana tsüingda iba senden amenba mapang nung Mokokchung District GB

Association Tir. Wb. Along Jamir-i jembidang GB ya British sorkar aliba mapang tentetsü aser iba mapa ya sorkar ajanga shimaka ita sen makai dang yimtsüng yimsüsüba nung village Council Act 1978 ajanga tashi aguja law enforcement agency ka ama Administration of Justice and Police Act of 1937 tashi amshia Commissioner Nagaland teteyuba October 28, 2022 kübok inyaka arur ta metetdaksü.

Election mapang, census inyakdang, sentong tongtipang akadang aser sorkar sentong balala nung GB-temi shilem tuluka agia inyaker, saka Village Council, Village Development Board (VDBs) maparen nung GB-tem senzüka yutsür, anungji iba ama maparen nung GB-tem nema shilem agidaksütsü

asoshi Commissioner Nagaland Dated 28th October 2023 tezüluba ajanga teteyuba metetdaksüogota Mokokchung District GB Association Tir. Wb. Along Jamir-isa adenshia aliba GB-tem dang metetdakja lemsatep.

Mokokchung District GB Association Tir-isa külem GB's-tem dang administration aser nübur ajak den teka amteper sorkar teteyuba nung pei aliba tesemtem nung Mokokchung District nung aliba GB ajaki nübur asoshi inyakdi ta ayongzüik.

Iba sentong GB-tem tsüingda nung shisalemsatepa tarutsü mapangtem nunga akokba tashi sorkar aser nübur yari alima ainba nung shilem tajung agitsü lemsatepba mapang tajung agia liasü.

Kohima nung Northeast India Youth Leaders Conclave alitsü

Dimapur, Yimpoksüi/Nov. 06 (TYO): National Foundation for India (NFI) ajanga Directorate of Youth Resources and Sports, Government of Nagaland den lungjemer NEIMUN ya Knowledge and Technical partner ka ama süa anogo ana Northeast India Youth Leaders Conclave sentong Capital Convention Centre, Kohima nung ayongzüka agitsü lir. Iba sentong ya November 7 aser 8, 2023 anogotem agitsü.

Iba sentong indang nükjidong ya lanur lenirtem jembishinü akatsü aser shisatsü angazüksü aser pei alidak temelenshi tajung bener arutsür ka-ka akumtsü aser region indang sustainable development nung yarir kumdaksütsü asoshi lir.

"Empowering Youth Leaders: Bridging SDGs and Socio-Economic Development" omen nung ajemdaker iba sentong nung Sikkim densema

Northeast India nung aliba state ti nungi lanur 100 adenshia shilem agitsü.

Iba sentong nungya region nung biodiversity peria aliba aser geo-political landscape nungi tajangzük bushiba, Northeast India nung lenla ajak nung kongshia terenlok aser rongsenketzüng tsütsü maongka balala indang jembitsü.

Northeast India Youth Leaders Conclave nungya lenla/wadang balala nungi tejangja nübu arua jembitsü, iba sentong nükjidong tongtetsüsa yangluba aliba session nung shilem agirtem len anitsü.

Sentong tenzüka Advisor, Water Resources, Government of Nagaland, Tongpang Ozükum-i tongti tesemdang o jembitsü aser iba sülen Biraj Patnaik, Executive Director, NFI ajanga Opening Remarks aser Kethosituo Sekhose, Director, Directorate of Youth Resource

and Sports, Government of Nagaland ajanga Plenary Speech agütsütsü.

Iba sentong ya Local Public Sector Alliance, Washington DC nungi Limabenla Jamir, Development Consultant onir süir agitsü.

Iba sentong nung shilem agirtem telok lemsar sensaksem akatsü aser yimdak yimtsüng nungi lenirtem den jembishinüa parnok tajangshiba aser parnoki terenlok maparen inyakba indang angazüksü.

Technical session tem nung lanur lenirtem ya meimchi tiyong südaksür bilema jembishinü akatsü, aser Sustainable Development Goals (SDGs) den jangyu medema sentong balala atongtsü.

Iba sentong ya European Union indang project #LeavingNoOneBehind ajanga senotsü teyari agüja ayongzüker alitsü.



Mon district kübok 43 Tapi Assembly Constituency bye election atema polling team mezüingpur asoshi Electronic Voting Machines (EVMs) aser Voter Verified Paper Audit Trail (VVPAT) tem November 6 nü yoka liasü. Item oset yokba maparen ya General Observer MG Rajamaniackam IAS; Deputy Commissioner & District Election Officer, Ajit Kumar Verma IAS; Superintendent of Police Mon, Shiluwabang I Longkumer, aser Rongsenmenla, Sub-Divisional Officer (Civil) & Returning Officer of 43 Tapi AC Mon nungertem lia inyaka liasü.

NSCN/GPRN (Akato Chophi) ajanga Tokhu Emong salem abener Dimapur, Yimpoksüi/Nov. 06 (TYO): NSCN/GPRN (Akato Chophi) ajanga Lotha Naga nung dangi tepela Tokhu Emong benjong salem abener, koba November 7 nü amunger aser Lotha kin asoshi tongtipang benjong ka lir, ta sangdong ka ajanga ashi.

Lotha oshi nung Tokhu tetetzü 'achi-ajemba' aser Emong tetetzü 'anisüngzükba' koba alurowa atemba temaitsü benjong ka lir aser nüburtemi alu

wadang nung meranga inyaker asendenshiba mapang lir.

Naga nung tejakleni aoba kintem rongnung Lotha nung ya ka lir aser parnoki mapanung bendanga agütsür meranga inyaker. Item sempet tajung ajanga Lotha nung adianu aser adianutsürtemi maneni prangshia dangar asoshi yimya tajung angazükdak asütsü imlar, ta NSCN/GPRN (Akato Chophi) sangdong ajanga ashi.

Kohima nung Special Summary Revision atema senden amentsü

Dimapur, Yimpoksüi/Nov. 06 (TYO): January 1, 2024 ya qualifying date ama Photo Electoral Roll asoshi tang tagidak Special Summary Revision atema Deputy Commissioner & District Election Officer, Kohima ajanga sangdong ka agüja liasü.

Sangdong ajanga ashiba agi, Commissioner & Secretary and E-Roll Observer for Kohima district, K. Libanthung Lotha IAS ajanga November

9, 2023 anepdang 10:30 ako nungi tenzüka senden ka amentsü ayongzüka lir.

Iba senden nung tang teinyakdak MLAs/MPs aser Kohima district kübok recognized political party, aser Assistant Electoral Registration Officers (AEROs) adentsü. Iba senden ya Deputy Commissioner, Kohima indang Conference Hall nung amentsü, ta sangdong ajangasa ashi.

NIELIT Kohima nung Startup Pitching Competition agi

Dimapur, Yimpoksüi/Nov. 06 (TYO): National Institute of Electronics and Information Technology (NIELIT) Kohima ajanga Startup Pitching Competition sentong November 4, 2023 nü NIELIT Kohima Auditorium nung takok ngua agia liasü.

"TECHNOVATE 3.0: Think, Visualize, and Realize" omen nung ajemdaker ayongzüka iba sentong nung state kübok tesem balala nungi startups 23 tashi arua aden aser item rongnungi tetendanger den pei shisa lemsateptsü asoshi telok ter shimteta liasü.

Iba sentong ya Startup Nagaland, Dept. of Industries & Commerce den lungjemer ayongzüka liasü.

NIELIT Kohima indang Director, Er L. Lanuwabang ajanga tarurtem pela agizükba den 'collaboration, innovation' aser industry aintsü asoshi bendanga agütsür inyaksü jembia liasü.

Department of Industries and Commerce, Government of Nagaland ajanga state nung entrepreneurship aser startup culture ajungkettsü asoshi mera balala agiba atema Virtual chief guest, Prof. Dr. M.M. Tripathi, Director General, NIELIT ajanga tenüngsang agüja liasü.

NIELIT Kohima ajanga sentong tulu ayongzüktetba asoshi Dr. Tripathi-i tenüngsang agütsü aser lanurtem dang rongsenketzüng tsütsü maongka adokdaksütsü asoshi maparen tasen inyaksü ajungshia liasü.

Nagaland asoshi Cyber Security, Generative AI aser Drone Technologies nung takok tajung angutsü tejangraba lir

asor itemji state asoshi tongtipang lir, ta Dr. Tripathi-i ashi.

Pitching competition sülen Questbook (CreatorOS Inc.) nung Chief Evangelist, Anubhav Tiwari-i workshop ka agia liasü, kong pai startup takok ngua amenoktsü asoshi shisatsü aser pai ajangshibatem lemsatepa liasü.

Iba mapang pai Northeastern state ajunga nungi shilem agirtem, kaketshirtem, NIELIT ketdangsurtem den teyari lenmang balala sayua liasü.

Iba tetoktepba nung panel member Abishek Mishra, Additional Director, STPI ajanga region nung startups tenzüka nung lungjemer yaritepa inyaksü tongtipang ta ashi.

T Lemnaon Wangsha, Joint Director of Industries and Commerce, Government of Nagaland ajanga iba tetoktepba sentong shibangja liasü aser pai iba mapang department ajanga state nung startups yariba maparen balala lemsatep.

Laisa iba sentong nung takok angur nem sempet agüja liasü.

Startup Pitching Competition nung "NAGA TOONS" temaba jenjang ajangteta senpet sen 60,000 angu. Tanabuba jenjang nguteter TechCynics nem senpet sen 40,000 agütsü aser tasembuba jenjang nguteter Unimestudio nem senpet sen 20,000 agüja liasü.

Team ana, GigLogics aser Diverse nem consolation prize sen 10,000 agüja liasü. Item senpet ya Startup Nagaland ajanga sponsor süa liasü.

Delhi sorkari odd-even scheme benokogo



Linük yimtiba nung mopung kanga menena akümba ken o sensaksemtsü asoshi Delhi Chief Minister Arvind Kejriwal lenisüba nung senden ka amenba mapang tangokba noksa nung angur. Delhi Ministers Gopal Rai, Kailash Gahlot, Atishi Singh aser Saurabh Bhardwaj nungera noksa nung angur.

New Delhi, Yimpoksüi/ November 6 (Agencies): Delhi nung mopung kanga mejungu akümba mapang ka nung Delhi sorkari school tem dang class 10 aser 12 dak alaker November 10 nü tashi physical classes magitsü tetuyuba agütsüogo aser November 13 nungi 20 tashi odd-even scheme tanaben benokogo.

"Iba scheme ya Delhi nung taoba mapanga benokogo. Odd anogotem nung gari number 1, 3, 5, 7 aser 9 agi tembangertem senzüdaktsütsü. Even anogotem nung gari number 0, 2, 4, 6, 8 agi tembangertem senzüdaktsütsü," ta Environment Minister Gopal Rai-i ashi.

Hopta ka tsüingda pollution levels dak ajemdaker scheme ya kodang nungi benoktsü iba indang telemetba ka agitsü, ta

Rai-i ashi. Diwali sülen mopung tali menena akümtsü ta bilema iba telemetba agiogo, ta pai osangbenertem dang ashi.

Forecast ka ajanga Mongolbarnü mopung speed ya 12 kmph asütsü ta takzüogo aser taruba anogo ana tsüingda mopung speed tajungba kümra mopung temenentem asemshia aotsü imla atar, ta pai ashi.

Odd-even scheme ya Graded Response Action Plan kübok pollution level Stage IV atongba mapang benoker koba Deobarnü tenzüokogo. Iba scheme ya AAP sorkari gari ajanga mopung menentsüba tajemba kümdaktsütsü asoshi 2016 küm benoka liasü.

Hombarnüa Delhi nung mopung jenjang kanga mejungu liasü aser 1 ako tashi nung AQI

429 liasü. Rai-isa, mobile anti-smog guns, road sweeping machine aser water sprinkler tem yokba densema yimti nung jenjang balala agiba indang metetdaktsü.

GRAP Stage IV kübok inyaktsü aliba tanga scheme tem rongnung tenüngdakba oset belenshiba garitem dak alaka Delhi-registered diesel medium aser heavy goods vehicles tem nokdangtsü, CNG/electric aser tenüngdakba oset belenshiba garitem dak alaka tata gari ajak nokdangtsü, electric/CNG/BS-VI diesel vehicles dak alaka tanga state nung züngoksema aliba garitem nokdangtsü aser kisüba aser ki abenba inyakyim ajak nokdangtsü, kong highway aser lenmangtem yangluba densema lir.

ED aser CBI BJP atema inyaksangshir: Kharge

Jodhpur, Yimpoksüi/ November 6 (Agencies): Ato Kilonser Narendra Modi-i central agencies tem mashiyimi amshiba atema Congress tir Mallikarjun Kharge-i Hombarnü PM aitsüogo aser ashiba agi, BJP atema nübo ayimtsü asoshi Enforcement Directorate, Income Tax Department aser Central Bureau of Investigation yoker.

Election agitsü aliba Rajasthan state kübok Jodhpur nung rally ka nung o jembiba mapang pai linük rongsen ayuaba atema BJP aija liasü.

"Ato Kilonser Modi tesem kati oa mejembi tsüingda parnoki BJP atema nüboyimtsü asoshi ED, Income Tax, CBI yoker.. Congress anema parnoki kechi inyaker aji nenoki ngudar.

Parnoki linük rongsen ayuaba atema onok aitsür, saka parnoki linük rongsen ayur," ta pai ashi.

Kharge-i State Congress tekolakba Govind Singh Datasara meyong tesem balala ED-i meita aoba indang ateshia jembia liasü. ED-i ken o ashishitsü atema par jabaso ana jaokogo. ED-isa, chief minister Ashok Gehlot'er jabaso Vaibhav Gehlot jaokogo.

PM Modi aija Kharge-i ashiba agi, "o jembiba kecha agi kecha minyaktetsü. Chiyongtsü, mapa aser angazüktsü atema school agütsütsüla.. yimyim ayimba aser o tajung jembiba agi linük nung kecha mataloktsü."

Kharge-isa, PM Modi-i election mapang dang

sensakertem bilemteter, ta ashi. Pai ashiba agi, Modi yimsütsüba kübok takartem takarba akümer aser sensakertem sensakba akümer. Congress lenir yagisa, PM Modi-i, linük nung takartem yarir saka sensakertem dang nungi vote meshir, ta ashi.

Pai item agency tem dang Ato Kilonser indang "jawan" tem ta aja.

"Item nisungtem yagi onok arishir. Parnok tesülen toktsütsü aser onok tejakdangi aotsü," ta Kharge-i shisem.

Kasa mapang nung chief minister Ashok Gehlot-i ashiba agi, Rajasthan nung Congress-i election akoktsü.

Rajasthan nung election November 25 nü agitsü aser result December 3 nü sangdongtsü.



Rajasthan Chief Minister Ashok Gehlot-i taruba Rajasthan Assembly election atema Sardarpura constituency nungi Jodhpur nung nomination papers file asüba noksa nung angur.

SFJ lenir Pannun-i Air India amokmeren

New Delhi, Yimpoksüi/ November 6 (Agencies): Canada nung amendaker aliba kiralongrar telok Sikhs for Justice (SFJ) lenir Gurpatwant Singh Pannun-i, November 19 sülen Air India tayimtsü nung senzürtem amokmerenba ya züba züba magitsüla kechiyong nüburtem lendongi aitsü akok ta itangitertem source kati metetdaktsü.

Pai India nunger lanurtem rongmesotsü meranger aser 1985 küm Air India Kanishka tayimtsü poksatsüba ama kasa lendong atalokdaktsütsü amokmerena arudar.

"Onoki Air India aoba yimti tongtibangtem nung lenirtem nem kümdangshia alitsü atema osang agütsüogo. Pannun alima ajunga nung sadem sadema senzür aser linük kechaia jenjang magiba ya tebilemstü tulu lir," ta source-isa ashi.

Source-i ashiba agi, lendong tulu atalodaktsütsüsa Pannun dak tashi mali ajisüka pai lanurtem rongmesotsü meranger.

Emperor Kanishka tenüng nung jatsüba Air India Boeing 747 tayimtsü 1985 küm June 23 nü Toronto nungi Montreal indang Mirabel airport, London indang Heathrow, Delhi indang Palam aser Bombay indang Sahar airport-i aotsü asoshi apuso saka anüngtom nung poka passenger 329 aser crew 22 tepseta liasü.

Pannun-i, Sikh nungertem dang November 19 nü Air India tayimtsü nung mesenzüktsü tekümdangtsü metetdaktsüogo

asur Vancouver nungi London-i aoba airline tem 'global blockade' ka asoshi ayongzükogo. Anogo ishika tejakdang video ka ajanga Pannun-i iba lendong nung taküm samatsü akok ta shiogo. November 19 nü Indira Gandhi International Airport shibanga ayutsüla ta shia pai India sorkar amokmeren. Kasa anogo ya Cricket World Cup final asayatsü.

Kasa sangdong ajangsa pai Indira Gandhi tepsetertem tushia jembioogo aser ashiba agi, New Delhi nung IGI airport ya Beant Singh aser Satwant Singh tenüng nung jatsütsüla ta ashi. Beant aser Satwant na ya Indira Gandhi indang body guard liasü aser tenati taoba PM ya tepset.

Pannun-isa, actor Amitabh Bachchan, Congress lenir Kamal Nath aser Jagdish Tytler nunger amokmerenogo.

Pannun-i amokmerenba ya India sorkari kanga süoki ia agir. Pai yimjak nung linük amokmerenogo aser aiben mepeshiaka kecha jenjang magir, ta intelligence sources yagi ashi.

Pai UK aser Canada nung Indian High Commissions makogo. "Onoki onok airlines indang security akangshioogo. Onoki security guidelines dak ajemdaker tetuyuba agütsüogo aser linük balala nung India indang mission temi ken o dak sendaka aliba ketdangsurtem den tongtepratepa inyakttsü. Pannun-i nüburtem rongmesodaktsütsü ta tsüuba bilemer," ta source-isa ashi.



Tawa shimba Chief Information Commissioner Heeralal Samariya Rashtrapati Bhavan nung Tir Droupadi Murmu, Vice President Jagdeep Dhankhar aser Ato kilonser Narendra Modi nunger den tangokba noksa nung angur. Delhi Ministers Gopal Rai, Kailash Gahlot, Atishi Singh aser Saurabh Bhardwaj nungera noksa nung angur.

Chhattisgarh nung IED ka poka BSF jawan ka aser polling ketdangsur ana yiru

New Delhi, Yimpoksüi/ November 6 (Agencies): Chhattisgarh kübok Naxal puri kongshir aliba Bastar tesem nung Kanker district nung Hombarnü Improvised Explosive Device (IED) ka apokba sülen Border Security Force (BSF) jawan ka aser polling team züngsem ana yirugo.

Iba lendong ya Rengagondi yimtsüng anasa nikongtsütsü 4 ako nung ataloka liasü.

State nung Assembly election mezüngbuba phase magi tsüingda polling booth amenoktsü atema oya aliba mapang iba lendong ataloka liasü. Chhattisgarh nung election ya Mongolbarnü agitsü.

BSF sepaitem, state police aser polling ketdangsurtem, Rengaghati nung polling station amenoktsü atema Chotebetiya police station kübok Marbeda police camp nungi apusoa oa liasü.

Team nung züngsem kati pressure IED ka nung ajemba sülen IED ya poka liasü. BSF constable Chandraprakash Sewal aser polling ketdangsur ana yirua liasü.

"Yirur alirtem ya temang anepalutsü atema Chotebetiya-i anirogo. Parnok ajak temang tajungba lir. Team aser security personal tem kecha timtem melei Rengagondi polling booth tongogo," ta ketdangsur kati ashi.



TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜI (YIMPOKSÜI) 07, 2023

Asen government ya koda ?

Nagaland state tain akümdang tajungba aser takarba akümer masü tesensakba aser tamajungba kuma aienba agi nübortem timtemba angudang kanga tezü atanger aser talila shisabolua aiter. State government mapa nung tenzükertem nem ita tama den külemi ita sen agütsütsüba ser nung tanabuba ita ama tashi nunga ita sen magütsütet timtemba aiben angur, ano government tenzükertem mapa nungi anendang agizüktsü asoshi bendenba sen dena magütsütetba osang angashidang government nung senotsü dang masü saka inyakyim (governing system)-a kecha mali aküm asü, koda (?) ta rataa bilemer. Ano, tang state government-i taoba election mapang nija indang gari amshiba indang taa magütsütetba agi atar matatet aser tawak marem gari kiburtem telongjemi Nagaland nung khu abenba aser nisung amenba garitem kata mejajadaksüi anogo tatazük ka maka nokdangba sentong yagi government-i nübortem nem talila timtem tuluka agütsüdagi ta kanga temulung shia bilemer. Atangji, pei gari tangari hire bener aoba taa magütsüba agi jashir ano gari-ang mesenzü anenbaji mashikoshi mapa amai bilemer, kechiyong iba jagi government nung alirtem akoksatsü masü saka gari kiburtemang talilaba akoksatsü. Ajisüaka, tejashi sünemdak maka, tangari masü pei government-i magütsür anungji kechianga masayang ano tali tejashi sayua pei-ang akoksatsü latet südi. Ibaji pei mang raksaa lumiba den kasa lir. Talisa, Election mapang nungbo gari amshibaji gari kibur dang mepishia meshia amshir masü saka yimten tashi amshia pua ayur aser election maparen ajak temer külenang chioker. Aji dang masü saka election mapang nung senzüsübaji tanga akhi mapang nung senzüba amato masü saka lendongbang nung senzür, anungji shitakba nungbo hire senji mapang shitak nung agütsüsübaji dang masü saka talila agütsütsüla. Shir indang gari südir süang, asen nisungbo, khu abentsü mesüra nisung amentsü atema gari alir senzübaji sen akaba agi senzür masü saka sen makaba agi bank nungi sen apur gariji alia sen aazüka kibong mesütsü nükjidong nung senzüdaksür, anungji gariji raksar anogo ka mesenzü nunga kibur asoshibo takoksa kanga tulu ajurur. Iba ama kibong ka indang gari hopta junga amshir, küm junga hire asüba sen magütsüra koda asütsü ? Atangji, government nung inyakertemi item timtemji memetet, majangshi aser merajemtsüa akok, kechiyong parnokjibo sen apua gari hire nung jajadaksür kiburtem ama timtemertem masütsüa akok. Ibayongji, tsüraburtemi "takar chiri aya-tzura memetet ama," ta jembir. Aji oda, tanü asenok government nung alirtemi "takar chirtemi ayatzura memetet amaji" pei nübortem timtemba memetetra gari kiburtembo sentsü agi tsübangtsü, idangji gari anishirtem nem ita sen magütsütettsü, idangji gari kibur o gari anishisang na kidangbo chipo metongdaksü. Kasaji PWD, PHE aser Power department nung ad hoc nung inyakertem kibong aika nung atalokdagi ta bilemdi. Shitakbabo item ama timtemji reprangtsü atema government alitsüba shisatsü ya aru aser tenzük.

OLEMSABANG

Tsüngrem tenzükter taküm ka koma alitsüla

~ L. Kika Pongener.

(Yashi adok nungi...)

Tsüngrem lar/arogo tenzükter taküm kaji, jembishinu nung tazüokba taküm asütsüla aser tebang telili masütsüla. Lokti ajak nung pei pei telok jurila mim 'o' (Secrecy) kar lir. Lokti ka nung jurila mim o (Secret)-ji melira, lokti ka tashi-ita nokdaka malitsü. Tsüngrem lar/arogo tenzükter kati, pei tenzükba arogo majungba/tashimaitba indang nungsen jembia, aser pei tenzükba/pei amenba menden jurila mim o (Secrecy) kipok ajak nung jembia jajara, iba arogoji kodanga sunepa malitsü. Tsüngrem lar/arogo tenzükertem kinungtsür/kinungburtema dena tebang telili masütsütsüla. Tsüngrem oi ashir, "Yamajisa parnok kinungtsürtema teshisadangba alitsüla aser tebang telili masütsüla" (1 Timoti-3:11). Tsüngrem lar/tenzükter shirnoki pei tebang temeli mazüokteter, parnokji arogo nung tenzüktsü tetemsu masü. Tsüngrem oi ashir, "Saka memeshi jembia tebang liliba nungi pila-ang" (1 Timoti-2:16). " Oh Timoti, tebang liliba nungi aser tiyazü agi ajaba shisatsü anema tenokdangba nungi meyipa oa, ne nem kechi benloka yutsü aji nukang" (1 Timoti-6:20). Anungji Tsüngrem lar/arogo tenzükter kaji tebang-temeli azüoka yutetba taküm asütsüla. Atangji, Tsüngrem lar/arogo tenzükter ajaki pei tenzükba mapa/pei amenba menden akümstüba wazüka ayutsübaji ajak dang nungi kanga tongtipangba sudaktsütsüla.

Tsüngrem lar/arogo tenzükter kaji, pei sasa jaklaliro azüoktetba taküm asütsüla, mit-mero tamajung aser ain-aponng mazüoktetba taküm ka masütsüla. Tsüngrem lar/arogo tenzükter kaji, ajemalu, tesungjem, tila kümtetba aser ajak den junga litetba taküm asütsüla. Tsüngrem oi ashir, "Saka Kibuba tenzükteri merarateptsüla, saka ajak tsüngdang ajemalu, tesayutsü tesangra, aser tazüzükba nisung asütsüla" (2 Timoti-2:24). "Kechiyong Tsüngremji rongrongshishidaksüba Tsüngrem masü, saka tesungjem Tsüngrem lir" (1 Korint-14:33). Tsüngrem tenzükter kaji tangari tsübutsüsa tesashi nisung masütsüla. "Kechiyong Tsüngremi asenok nem tetsübo tanela masü, saka temeim aser tazüokba tanela agütsü" (2 Timoti-1:7).

Tsüngrem lar/arogo tenzükter kaji, sen meimba aser rongsen penbur ka masütsüla. Tanü putu nung, Tsüngrem tenzükter/arogo tenzükter karibo Tsüngrem mapa/arogo/mungdang mapa nung tenzükba, sen bushiba luyim/tajangzük angulen lenmang tajung ka ama bilema tenzükera karbo alitsü akok. Tsüngrem oi ashir..."Shingaia kibur ana metenzüktet, kechiaser pai ka sempatsü aser ka meimtsü...Nenoki Tsüngrem aser rongsen metenzüktet" (Mathi-6:24). "Parnoki tsüngrem tsübubaji tajangzük angulen...ta bilemer" (1Timoti-6:5 b). "Arogo tanükter kaji, sen penbur masütsüla" (1Timoti-3:3 b). Atangji, Tsüngrem tenzükter/arogo tenzükterji sen penbur, pei ajangzüktsüba nung dang rangloker tenzükter ka masütsüla.

Tsüngrem lar/arogo tenzükter kati, pei kechi angatet aji dang shitak aser pei kechi mulong aji dang agitsü...ta ametba, tekong temerang nisung masütsüla, saka arogo inyakyim/sentong ajak nung tashi angaa anitaktetba/litetba taküm asütsüla. Tsüngrem lar/arogo tenzükterji arogo madak kibur masü, saka arogo küpok tenzükter ka...ta angatettsüla. "Nisung chir-i tenzükdaksütsüba masü, saka tenzüktsü aser aika alang pei taküm agütsütsü aru...Nenok rongnung shibai tuluba kümnur pa nenok tenzükter asütsü; aser shibai temaba sunur pa nenok kilir asütsü" (Mathi-20:27-28). Tsüngrem lar/ arogo tenzükter kaji, o nung masü, saka mapa agi liteta sayuba tenzükter/tenzükla asütsüla. Tsüngrem oi ashir..."Yamaji nisungtemi nenok mapa tajung ngua, kotak nung aliba nenok tebu sentsüwangshidaksütsü asoshi, parnok madang nenok tesangwaji jungkai adokdakjang" (Mathi-5:16). "Saka ni tangar dang sayutsüngir külen, ni kü sasa magizükalir ta sur, ni kü mang nung azüoker aser iba lar kümdaksür" (1 Korint-9:27). Anungji Tsüngrem tenzükter kaji tangar asoshi tatishitsü tajung taküm ka asütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria north tsütsü kiralongrari tamanger ka tepset, 25 apu

Abuja, Yimpoksüi/Nov. 06 (Agencies): Fulani shiruru metsürtem südi ta temolung melemi aliba telok kati October 31 anepdang Nigeria north tsütsü yimtsüng ka maka Khristan ka tepset, ana yirutsü aser 25 pua bener ao ta osangtem ajanga ashir.

Kaduna state south tsütsü Kachia County kübok Ungwan Baka yimtsüng nung nüburtem mejanga oa alidang lendong ya agütsü, ta yangji alir Emmanuei Yusuf-i ashi.

"Mongulbarnep Khristanpur aliba yimtsüng ya amak. Iba lendong nung yirur alirtem tang mozüki nung munga lir," ta Yusuf-i Morning Star News dang text message ajanga ashi.

Ano iba yimtsüng nung alir Herbert Chindo-i ashiba agi, shiruru metsürtem aser danga kiralongrar temi taoba mapanga Kachia nung aliba Khristanpur dak timtem agüja liasü.

"Onok aliba tesem nung ibai lendong tasembuba alitsü. Imlibilema onok asoshi sarasademjang," ta Chindo-i ashi.

April 3 nü nok-nü bena alirtemi iba tesem ya amak aser Awon nung aliba Government Secondary School nungi Khristanpur tetsür ti pua bener

ao, ta yanghi alir Jonah Ayuba-i ashi. Item tetsürtem ya mitkartemi April 18 nü kumzük, ta pai ashi.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaksüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadangba rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West Africa Province (ISWAP) aser danga telungpur temi Khristanpur aliba tesem meita aor, tepseter, tashiyim

amshia shi nung medemer, sen meshitsü mesüra alar ama ayutsü asoshi pua bener aor," ta World Watch List ajanga ashir.

"Taküma Khristanpur timba aliba linük south tsütsü azüdokshiba lir... Nigeria sorkari maneni ibai tamangba yimsü nung ajemdaker reshikangshiba masü ta ashir, anungji Khristanpur temeden nung aibelener memerenshi yutsür."

Nigeria aser Sahel region nung Muslim Fulani million aoka lir aser parnok ya kin-kidong noklang dak tema lir aser parnok ya balala nungi jakzük aser kari Islamist tangatetba arok-aroka amanger, ta United Kingdom indang All-Party Parliamentary Group for International Freedom or Belief (APPG) ajanga 2020 report nung ashi.

"Parnoki Boko Haram aser ISWAP den mesüktepa tasa yanglua Khristanpur dak tenük yoker," ta APPG report ajanga ashi.

Khristanpur meyong ali tashiyim amshia rakzüksü aser Islam yimsü prokshitsü tejangraba nung shiruru metsürtemi Nigeria indang Middle Belt nung tamangertem amaker, ta Nigeria nung aliba Khristan lenirtemi ashir.

ANO GO ABEN TSÜNGREM DEN

Ajak bendanga agütsür

"...Pai pei mulungba inyaktsü; tajung ajak nung perijang; Pa dang sentsüwangshi teti tatem maka sang. Amen". Ibri 13: 20-21.

Tsüngremi asenek dak mapa inyaker. Aseni mamangba ajanga tetsükdaktsü adokaka, Tsüngremi mapa inyaker, kechiaser aji pai mulungba. Tsüngrem nükjidongji asenek tashi (mature) kuma indaktsütsüba lir.

Tanur sor temangji tazüokba aser angazükba ajanga melenshia ainer, saka telunglen jaklabo telunglen maneni ainer. Tsürabur nungi anguba takümüji terenlokba agi azüoker. Khrista ajanga Tsüngremi agütsüba taküm Tsüngrem peladaktsüba mapa agi azüoker.

Khristan aikati alima libaliroji Khrista mesük taküm den medemdanger. Jilu aiba agi Khrista mesük takümüji adokdaktsütsü makok, saka telunglen taküm melenshiba agi adokdaktsür. Tanur ka ku temeru aser teküp sentsü temesüng aso, kechiaser tebu dak itemji keta liasü. Asenek dak Khrista shiba alir Pa dak aketba yimya keta alitsüla. Kibubai asenek Pa mesüka kümdaktsütsü asoshi mapa inyaker, koba asen shi taküm agi angutsü akoker. Atangji asenek dak Adam taküma alir koba shimtsü asenek mulung. Shia aruba Khrista dak temenen yimya akoktsü ain tashi lir. Tsüngrem nem bendanga agütsüba ajanga asenoki takok angur. Khrista mesük asen mulungjang nungi adokdaktsüba taküm jaklaji Tsüngremi agizüker.

Temolung meyipdaktsüba mechi Nepal nung pastor ka tepuokdak ayutsü



Pastor Keshab Acharya aser pa kinungtsü Junu Acharya.

Kathmandu, Yimpoksüi/Nov. 06 (Agencies): Nepal nung pastor kati application agütsüba Supreme Court-i magizük aser high court ajanga küm ka tepuokdak yur senchi achitsü obendang agütsüba ama inyaktsü ashi. Temolung meyipdakja Khristan dangi anir aru ta tai tongloksüba asoshi kuli kecha mongutetaka iba temerenshi ya agütsür ta pastor-ia ashi.

Nepal kübok Pokhara nung aliba Abundant Harvest Church nung arishi küm 35 tain pastor Keshab Raj Acharya ya iba linük indang proselytization law kübok küm ka tepuokdak ayutsü aser senchi sen Nepalese rupees 10,000 achitsü

obendang agütsü. Iba ozüng ya August 2018 nungi amshia arur.

"Supreme Court nungi onok teimla tulu liasü aser iba obendang ya onok asoshi taoksatsü lir. Iba ama obendang agütsüba kuli onoki tang tashi mangateter," ta Pastor Keshab Acharya kinungtsü Junu Acharya-i osangbener dang ashi.

Acharya ya mashi mapang aputsü, ta lai ashi.

Supreme Court indang obendang ya October 6 nü agütsü, kong Acharya-i application tasen agütsüba magizük aser high court-i küm ka tepuokdak ayutsü July 13 nü obendang agüja aliba bhukuma liasü.

"Supreme Court ajanga mezüng ken o jembidang kuli kaket kecha mereprangi onoki mebishiba magizük. High court obendang ya tatem asütsü aser iba ken o joko mejembitsü ta ashi. Parnoki mebilemdangi onoki mepishiba magizük. Ken o magizüksü asoshi parnoki minute ana mesüra asem dang agi," ta Pastor Keshab Acharya-i jashiseta ashi.

Dolpa District Court ajanga November 30, 2021 nung pastor Acharya ya küm ana tepuokdak ayutsü aser Nepal nung sen 22,244 senchi achitsü obendang agütsü, koba parnoki high court dangi aben aser yangji tepuokdak ayutsüba küm ka aser sen tera ajemja liasü.

Pa dak tai mali ta kinungtsü Junu temolung lema lir aser pai nisung shinga tashiyim amshia tamangba yimsü memelendaktsü ta ashir.

Sorkari tatishitsü sayutsü merangba aser Nepal nung Khristanpur dang parnok tamangba yimsü meporokshidaktsütsü mechi iba mapa ya inyaker, ta Junu-i ashi. Nepal nung Khristan yimsü züina aoba ngua Hindu extremists tem amokmerener ama bilemer ta lai ashi.

Kuli tejangja meliaka nisung kati takum kuli agütsüba nung ajemdaker Pastor Acharya ya aitsü. Iba taitsüba nung kuli agütsütsü nisung shinga maru.

"Tamangba yimsü melenba nung Keshab dena mali aser pai paper pamphlets dang lema agütsü, koba onoki zünger indok

ta kuli agütsürtemi ashi," ta Junu-i ashi.

Tamangba yimsü melenba mechi pastor nem temerenshi agütsütsü langa lir asü ta asüngdang dang parnoki masü ta langzü. Item kuli ya tang tashi court nung record lir, ta Junu-i ashi.

Junu aser Pastor Acharya na iba arogo küm küm toku inyaka arur aser tena jabaso ana, ka arishi küm pongu aser ka arishi küm pezü lir.

2020 küm March 23 nü Pastor Acharya ya Pokhara, Gandaki Pradesh Province nung par kidang lia apuba sülen iba ken o ya atsütepa aru. Tekülem sentong ka nung coronavirus nungi jembua alitsü asoshi tanüla tsütsü tesayuba kar agütsüba video ka YouTube nung prokshiba sülen pa apu.

Iba sülen kanga kera osang tiazi prokshia na Khristan kumra COVID agi na memeneptsü ta Pastor Acharya-i ashi ta tai tongloksü. Ajisüiaka pa kinungtsü Junu-ibo iba ama o kodanga mejembi ta ashir.

Pastor Acharya ya mezüngbi Kaski District Administration Office ajanga April 8, 2020 nung Nepal nung sen 5,000 agütsür bail nung chiok, saka mapang tatsüka tsüngta tamangba yimsü tsütsü temolung yirutsüba aser tamangba yimsü melendaktsüba ken o nung anu tanaben apu.

Iba sülen Pokhara Kaski District judge ajanga April 19, 2020 nung bail asoshi sen ya Nepal nung sen 500,000

kumtsü. Ano May 13, 2020 nü bail nung chiokba sülen idangjisa courthouse nung pa tanaben apu. Iba sülen pa mile 400 pilar Dolpa District nung jail kati yok.

May 21, 2020 nü Dolpa District Attorney ajanga Nepal Criminal Code indang Section 158 (1) aser Section 158 (2) amshia ken o benok, kong tamangba yimsü ka nungi kati melenba nokdang.

May 22, 2020 nü Pastor Acharya indang bail application magizükba sülen bail sen Nepal nung sen 300,000 kimsü aser July 3, 2020 nü chiok.

Iba sülen July 18, 2020 nung International Religious Freedom Roundtable ajanga Nepal attorney general dang Pastor Acharya apuba tanaben asadangtsü ajungshia liasü. Kasaji US Department of States indang 2020 International Religious Freedom report nunga shia liasü.

Bail nguaka Pastor Acharya ya ita ka nung asemben court-i aor. Iba yagi senotsü nung timtem ajuruba kisung masü temang shi nunga kanga belemer.

Karnali Province kinüklen aliba Dolpa District ya Tibet den arütsüa lir asünung timtem tali ajurur. Iba tesem ya danga district tem den indang-indanga sendaktepa mali, aser lenmang shidak mali. Iba lenmang nung gari, bicycle aser ano asemnü tetsüng agi jajar.

Nepal nung aliba Khristanpur ya 2018 küm nungi tenzüka tali reshikangshir.

**AO OSHI ANGAZÜKDAK:
TANÜ ANGAZÜKTSÜBA OJANG**



Sazük

(v) temzüka aluba (bulging out)

* Tebok sazüka maludaktsütsüla.

Sazük

(v) teni nungi tango sashia alu (breathe out through nose)

* Teshinem menem dang teni nungi tango sazüka yoker.

OLONG PAITEP # 6688

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6687 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo, 1
- 4. Alia, 16. Angati, 17. Odi, 18. Azü,
- 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

NAI-A YA METETTER MA

India kübok statetem nung Chief Minister küm 20 tema inyaker yamai lir :

No.	Name (Birth-Death)	State/Union territory	Term of office		
			Assumed office	Left office	Time in office
1 ^[1]	Pawan Kumar Chamling (b. 22 Sept 1949)	Sikkim	12 December 1994	27 May 2019	24 years, 166 days
2 ^[4]	Naveen Patnaik (b. 16 Oct 1946)	Odisha	5 March 2000	Incumbent	23 years, 246 days
3 ^[5]	Jyoti Basu (8 Jul 1914 – 17 Jan 2010)	West Bengal	21 June 1977	6 November 2000	23 years, 138 days
4	Gegong Apang (b. 8 Jul 1949)	Arunachal Pradesh	18 January 1980	19 January 1999	22 years, 250 days
			3 August 2003	9 April 2007	
5	Lal Thanhawla (b. 19 May 1938 or 1942)	Mizoram	5 May 1984	21 August 1986	22 years, 60 days
			24 January 1989	3 December 1998	
			11 December 2008	15 December 2018	
6	Virbhadra Singh (23 Jun 1934 - 8 Jul 2021)	Himachal Pradesh	8 April 1983	5 March 1990	21 years, 13 days
			3 December 1993	24 March 1998	
			6 March 2003	30 December 2007	
			25 December 2012	27 December 2017	

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

CM Sarma-i APSC nung aibelenertem kümüzüka ayur: Akhil Gogoi



Himanta Biswa Sarma & Akhil Gogoi-i ashi.

Guwahati, November 6, 2023 (Agencies): 2013-2014 batch nung APSC ken o nung taoba chairman Rakesh Paul aser minister kar densema liasü aser iba jagi Himanta Biswa Sarma-i aniba BJP sorkari parnok bail nung chiok ta Sivasagar MLA Akhil Gogoi-i ashi.

Chief Minister Himanta Biswa Sarma-i iba ken o nung

tai tonglokja alirtem kümüzüka ayur ta pai ashi. "BJP sorkari tai tonglokja alirtem kümüzütsü meranger. Himanta Biswa Sarma'er sorkari taoba chairman Rakesh Paul dak tai mali kümüzügo" ta Akhil-i ashi.

"Sarbananda Sonowal'er sorkar mapang Rakesh Paul tepuokdak nungi malutet saka Sarma-i Chief Minister inyakba

sülen Rakesh Paul tepuokdak nungi chiok. Rakesh Paul dang masü saka APSC ken o nung tai tonglokja alir aika tepuokdak nungi chiokogo, iba ya tebilemsü tulu ka lir" ta paisa metetdaksü.

Ochimashi ajanga shimba ketdangsür 24 tang mapa teinyakdak lir ta MLA Akhil Gogoi-isa ashi.

BJP sorkari senotsü lemtet tai agir aser parnoki sen apur endoker. Kiyimba sentong kati helicopter nung aoba Chief minister kati kechi inyaktetsü? ta paisa ashi.

"Chief Minister-i transport department garitem ajanga anogoshia Rs 80 lakh aazüker. Iba ya chief minister indang donation parties lir. Ni Kaziranga nung ita ka atema Rs 10,000 agütsügo. Sorkari yi aser gari senchi dak alaka sen tarulen kecha amali" ta Akhil-isa ashi.

KLO-i Centre aser state sorkar den yimjung olemtep tembangnür

Guwahati, November 6, 2023 (Agencies): Kamatapur Liberation Organisation (KLO)-i Centre aser state sorkar dang tekaratiba nung yimjung olemtep tembangtsü ayongzüko.

KLO-isa peace accord tiptema agitsü atema parnok chairman Jeevan Singha aser tanga züngsemtem anema ken o benoka aliba ajak agientsü takhangba agütsügo.

Parnokisa Assam aser West Bengal nungi Kamatapur ta ser

state balaka akümtsü takhangba agütsür.

KLO-isa Eight Schedule nung Kamatapuri oshi dendaktsütsü aser Koch Rajbongshi nunger Scheduled Tribes (Plain) category kübok dendaktsütsü akhanger.

January 2023 nung Jiban Singha Koch-i India sorkar aser KLO tsüngda olemtep tenzütsü sangokja liasü.

Ajisüaka India sorkari Kamatapur nunger ashioktsür ta Jeevan Singha-i tai

tongloksüba sülen September 2023 nung mepetmesü adoka liasü.

Singha-i video ka ajanga Kamtapur nunger dang iba atema lungkak aittsü aser temetentem atema noktaksü ayongzüko.

August 28, 1949 nung India aser Greater Behar State tsüngda Merger Agreement sign sütepba sülen tanü tashi Kamtapur region nem tagütsütsü tim magütsür ta KLO chairman Jeevan Singha-i ashi.

DNLA deputy C-in-C Babu Hojai telok nungi anentsür

Haflong, November 6, 2023 (Agencies): Dimasa National Liberation Army (DNLA)-i taoba deputy C-in-C Babu Hojai (Popil Hojai) aridokogo. Babu Hojai-i Congress party nung adenba sülen DNLA nungi anentsü.

DNLA loksaba sülen tentetba Hirimba Justice Forum nung president Kharmindao Dimasa-i ashiba agi "Hojai-i

political party nung adenbaji onok telok temzüng alema lir."

October 28, 2023 nü DNLA den civil wing- Dimasa People's Supreme Council (DPSC) züngsemtemi Chief Minister Dr. Himanta Biswa Sharma lia Assam sorkar tsüngdang temai adoka liasü.

DNLA-i April 27, 2023 nü Centre aser Assam sorkar den tenangzüktep ka agitep aser iba

ya September 2022 nung ita trok atema unitary ceasefire tenangzüktep agiba sülen inyak.

Hirimba Justice Forum ya taoba DNLA züngsemtem ajanga tentetba lir. Iba Forum indang tongti teinyaktsüji DNLA, Centre aser state sorkartem tsüngda Memorandum of Settlement (MoS) mapa küma inyakba reprangtsü atema lir.



Manipur nung kaketshir ana Arambai Tenggol (AT) nung tezüngzüktep agitsü atema aodang len tom nung samaba sülen tensa mejungi kümogo. Tena ya Avinash Maibam (Khaba) 16 aser Ninthoujam Anthony (Temba) 18 na lir ta jangjaogo. Tenaprong ya ya Imphal West nung alir aser Honibarneap 9:00 ako meta Sekmai yimtsüng nung Arambai Tenggol tezüngzüktep agiba sentong nung adentsü atema aodang sama.



Palestine nunger dang temeim sayua Adana, southern Turkey nung aliba U.S. - Turkish Incirlik military air base tezülen longkak aita nūburtem adenshiba noksa nung angur. Deobarnū iba tesem nung Palestine nunger bhukuma adenshia alir nisung meyrirjang aika dak police temi tear gas aser water cannon khaloktsū.

Jordan-i Gaza nung field mozūki ka nem medical teyari agütsü

Jerusalem, Yimpoksüi/ November 6 (Agencies): Jordan aser Israel na tesendaktep nung Gaza Strip nung field mozūki ka nem tayimtsü ajanga jongdak nūngdakba medical supply tem agütsüogo.

Jordan chuba King Abdullah II-i Homabrñū sangdong ka ajanga ashiba agi, Jordan indang air force-i, parnoki 2009 küm nungi achaayanga aliba field mozūki ka nem jondak nūngdakba medical teyari agütsüogo.

"Tasü tait air force personnel temi Gaza nung

Jordan indang field mozūki ka nem jongdak nūngdakba medical teyari agütsüogo," ta pai X sabang ajanga metetdaksür.

"Iba ya Gaza nung yirur alirtem nem teyari agütsütsü asoshi onok mapa inyakba ka lir. Onoki Palestine nunger teti yaritsü," ta paisa ashi.

Kasa mapang nung Israel indang military-ia Homabrñū ashiba agi, parnoki teyari agütsütsü atema kidanger den sendaktepa inyakogo, kong chiyongtsü densema liasü.

"Item osettsütem ya temang manemi alirtem atema

medical staff temi amshitsü," ta military-isa shisem.

Taoba ita Saudi Arabia indang Arab News-i ashiba agi, Jordan indang field mozūki ya osettsüt peria maliba ajanga yakta shibangtsü akok.

Humanitarian organisations temi Gaza nung chiyongtsü, tzü, electricity aser totzū maliba ajanga humanitarian crisis tesashiba akümtsü ana nung aliba tekümdangtsü metetdaksüogo.

Deobarnū United Nations agencies aser NGO 18 tekolaktemi külem sangdong ka ajanga Gaza sabanga ayuba ya agizüktsü makok ta ashiba den teyari tekümsükba kübok takaratiba nung agütsütsü ayongzūka liasü.

United States Secretary of State Antony Blinken Turkey-i orr aliba mapang ka nung tang tayimtsü ajanga iba teyari agütsüogo. Pai, Israel, West Bank, Jordan aser Iraq dena semdangogo.

Tanga Arab linüktem ama Jordan-ia Israel-i Gaza nung taochi makai bomb pokloktsüba aitsüogo. Iba tesem nung Palestine nunger 9,922 shi tepsetogo.

China-i Myanmar dang teka amteper inyaksü ayongzük

Beijing, Yimpoksüi/ November 6 (Agencies): China-i Myanmar dang linük ana arrtsü kümzūka toktsütsü atema mepeshia metetdaksüogo. Military sorkar den raratepa aliba telungpur telok kati tongtibang shishilembadak outpost ka atsüngba sülen China-i iba temepeshiba agüja liasü.

Beijing-i Hombarn ashiba agi, Assistant Foreign Minister Nong Rong-i hopta tatemi Myanmar semdanga linük nung mangatettep adoker aliba indang sensaksemogo. Myanmar nung mepetmesü adoker aliba ajanga nisung 23,000 dak tema pei talidak tesem toktsür jena aotsüsa kümogo, ta UN-i ashi.

Myanmar semdangba mapang Nong-i Deputy Prime Minister aser Foreign Minister Than Shwe aser Deputy Foreign Minister Lwin Oo nunger den ajurutepa liasü.

"China aser Myanmar arrtsü tekümsükba kübok manokshi-i toktsütsü atema China den teka amteper inyaksü asoshi Myanmar ayongzükogo. China-isa, arrtsü nung aliba China nungertem aser parnok meyong kiojentem kümzūka toktsütsü aser China nunger personnel tem security akangshitsütsü

asoshi jenjang tapet agitsü ayongzükogo," ta Nong-isa shisem.

Myanmar nung telungpur telok kati arrtsü nung aliba Chinshwehaw jila atsüng. Iba jila ya China aser Myanmar na tsüngda shishilembaba nung tongtibang tesem ka lir aser küm nung USD billion 1.8 tashi tsütateper.

Iba jila atsüngba ya military sorkar asoshi takoksa tulu ka ama repringteter, shirnoki parnok yimsüsüba anema nokdakertem mazüokteti arudar.

Brehostibarnü China-i, Myanmar anütoktiplen tanga tang ceasefire benoktsü ayongzükogo, kong Beijing indang \$1 trillion Belt & Road Initiative kübok USD billion ka alang rail line ka yanglutsü sentong lir.

Myanmar sorkari tawa tayimtsü amshia Laiza jila makogo, kong Kachin Independence Army amenoka lir.

Myanmar nung military-i sorkar atsüngba mapang nungi China-i parnok pusema aruogo aser military lenirtem nem tenokdangba agütsür aliba anüolen aliba linüktem dang Myanmar sovereignty akümtsübütsü shiogo.

Central Pension Accounting Office (CPAO) Department of Expenditure, Ministry of Finance Trikoot-II, Bhikaji Cama Place, New Delhi- 110066

CPAO, D/o Expenditure, M/o Finance, Trikoot-II, Bhikaji Cama Place, New Delhi-110066 ajanga **November 20, 2023 nū hybrid mode (Physically and Virtually) ajanga Brahmaputra Hall, HQ, DG Assam Rifles, Old DGAR Complex, Laitumkhrah, Shillong- 793011(Meghalaya)** nung Pension Adalat ayongzüktsü ta Central Civil Pensioner ajunga dang metetdaksür.

Anungji, Central Civil Pensioners/Family Pensioners ajunga (Railway, Defence, Post and Telegraph maden) dang CPAO website <https://cpao.nic.in> nung pei timtemba agütsütsü mesüra e-mail ajanga cpao@nic.in mesüra post ajanga iba office indang S.r Account Officer, Pensioners Facilitation Cell dangi November 15, 2023 tashinung yoktsü metetdaksür. Prescribed format ya CPAO website nung angutsü. Pension Adalat nung shilem agitsü asoshi CPAO ajanga Pension Adalat agitsü anogo ka jelia Video Conferencing nung adentsü asoshi registered mobile number mesüra e-mail nung link ka yoktsü. November 20, 2023 nū Pension Adalat nung physically/virtually adentsüpur asoshi grievence register asütsü. Anungji nū indang PPO Number, Bank Account Number, Contact Address, Mobile Number, e-mail DI aser Pension Adalat (Physically/Virtually) nung adentsü yimya den nū indang grievence ashitsüla. Grievance ya post ajanga yokra, envelope nung "Pension Adalat-2023 (NE)" ta zülutsüla.

CBC 15111/11/0003/2324

Chief Controller (Pensions)

LAND FOR SALE

Behind Sovima Cricket Stadium

CONTACT 8974020568

RATE Rs. 490/- per Sq.ft. ANY SIZE AVAILABLE - Price Negotiable -

2024 Russian elections nung Vladimir Putin tokteptsü

Moscow, Yimpoksüi/Nov. 06 (Agencies): March ita tir election agitsü aliba nung Russia Tir Vladimir Putin-i tokteptsü telemtetba agiogo ta Russia ketdangtsür kati ashi. Iba election nung Putin-i takok ngura, pai Russia ya 2030 tashi anitsü akok.

Vladimir Putin-i Russia ya lendong-timtem aliba mapang ajanga ni anitsü nūngdaker ta shia lir.

"Putin-i tokteptsü," ta iba sentong meteter nisung aseme osangbener dang ashi aser telemtetba agiogo ta ashi. "Asenoki repringzūka yokba alima ya kanga tetsübotsü lendong agi sünga lir," ta ketdangtsür kati ashi.

"West lokteper Russia madak tashi amshir, anungji yimtenren tsütsü temelenshi kangabo menüngdaker," ta parnoki ashi.

Ano item Russia nunger ketdangtsürtem nungi kati ashiba agi, Russia tiri telemtetba ya tawa ang agi aser iba osang yakta sangdongtsü.

2024 küm March ita tir election agitsü aliba nung Putin-

i tokteptsü atema Kremlin nungibo osang kecha sangdonga mali. Saka Putin temang manem lir ta osang temai adokba ya West-i prokshir, ta parnoki ashir.

Vladimir Putin nem tir menden ya December 31, 1999 nung agütsü aser Josef Stalin sülen tir talangtiba pai inyaker aser küm 18 yimsü asüsang Leonid Brezhnev danga pai talangba inyaker.

Pa den yariteper temi pa indang nūbuyim tenzüktsü renemba mapang lir, ta arishi küm 71 tain Putin indang adviser temi ashi.

Russia nung elections ya tenüng agi dang agir, kechiaser yangi nūburtemi anema nokdakba kangabo mali aser opposition lenir tongtipang kar tepuokdak lir. Sorkari media azüoka lir aser sorkar teyari nung pai akoktsü ta news agency temi ashir.

Russia telungzük nung Putin indang approval ratings ya shilem 80 lir. Russia nunger osangkaket Kommersant nunga Putin-i election nung tokteptsü ta taoba ita sangdonga liasü.



Nepal northwest tsütsü Rukum District nung menoknok agi raksatsür aliba ki ka nungi nisung kati jana indoka oset bendenba noksa nung angur. Hokulbar aonung Nepal northwest tsütsü menoknok tesashi anoka nisung 150 dak tema asü aser nisung meyrirjang aika talidak ki makai akum.

Mathews ya cricket asaya nung 'timed out' asüba mezüngbuba asayar kümogo



Yimpoksüi/November 6, 2023 (Agencies): Tang tashi nung khen danga matalokdangi aliba tatalokba ka nung Hombarnü Sri Lanka nung batter Angelo Mathews ya international cricket puti otsü nung 'timed out' agütsüba mezüngbuba asayar kümogo.

Iba tatalokba ya Hombarnü Bangladesh aser Sri Lanka na Arun Jaitley Stadium, New Delhi nung World Cup asaya ka asayaba mapang ataloka liasü.

Over 25buba nung Lankan batter Sadeera Samarawickrama out asüba sülen Mathews aittsü liasü,

saka pa indang helmet strap nung timtem ka aliba ajanga pa menor ait.

Taoba mapang Sri Lanka captain ya helmet nung timtem aliba ajanga batting amentsü asoshi minute anashi menor ait. Pa menoa maitba sülen Bangladesh captain Shakib Al Hasan-i tashishiba ka agütsü koba on-field umpire-i agizüka liasü.

MCC law 40.1 (Timed Out) kübok asayar ka out asüba mesüra retire asüba sülen batter ka taruba ball agizüktü atema minute 3 tsüngda renemer alitsü nungdaker.

Ajisüaka ICC World Cup

2023 playing conditions kübok batter tem atema mapang tatakziük ya minute ana dang lir.

Iba sülen substitute kati helmet bener arutsü ajisüaka kecha tagidak maliasü, kechiyong iba mapang tashi nungbo pa out sütsür liasü.

Out sütsüba sülen Mathews-i umpire den sensak asem aser Shakib danga pa kechiba monu aji rasa ashitsü merang saka amajok liasü.

Asayar yagi umpire den mapa tatsüka asatep saka tatem nung tezüdangseta pitch toktsür ao aser boundary adenba sülen pai pa indang helmet mereptoka liasü.

10buba Kohima Open Volleyball Tournament 2023 ayonger

Kohima, Yimpoksüi/November 6 (TYO): 10buba Kohima Open Volleyball Tournament 2023 (tetsür aser tebur) November 27 nungi 30 nü tashi Indira Gandhi Stadium, Kohima nung asayatsü.

Taküm iba asayamung ya "Transcending through sports" omen nung ajemdaker asayatsü ta asayamung ayongertemi metetdaksü.

Iba asayamung ya Department of Youth Resources & Sports, Nagaland den longjemer Kohima District Volleyball Association-i ayongzüka asayatsü renema lir.

Asayamung nung tebur asaya akokba team nem senpet sen 80,000 aser tanabuba nem 50,000 agütsütsü.

Semi final nung tamakok anguba team ana nema senpet sen 15,000 agütsütsü aser best spiker aser setter nem senpet

sen 5000 agütsütsü.

Tetsür asaya nung takok anguba team nem senpet sen 50,000 aser tanabuba jenjang nung tembangba team nem senpet sen 30,000 agütsütsü.

Semifinal nung tamakok anguba team ana nem senpet sen 10,000 agütsütsü aser best spiker aser setter nem 5000 agütsütsü.

Iba asayamung atema registration form, Sports World, Main town, Kohima, Northern Sports, Sepfuzou aser G-Sports, PR Hill, Kohima nung angutsü.

Asayamung nung shilem agitsü asoshi taa sen 5000 agitsü aser form benoktsü atema tatembangbuba anogoji November 25 nü asütsü.

Osang tejangjaba agitsü atema item number: 6009641948/9856569364 nung tongteprateptsü asoshi asayamung ayongertemisa metetdaksü.

WTA Finals: No.2 Swiatek-i No.1 Sabalenka koka final-i iogo



Yimpoksüi/November 6, 2023 (Agencies): Tetsürtem ranking nung tanabuba jenjang nung alila Iga Swiatek-i Deobarnü WTA Finals nung world number one Aryna Sabalenka 6-3, 6-2 agi koka final-i iogo. Final nung la Jessica Pegula den asayatsü.

Arishi küm 25 tain Belarus tsür aser Australian Open tesüsabuba koker alila yagi iba asaya kokra la No 1 jenjang nung küm tembangtsü liasü ajisüaka Swiatek-i la nokdangogo.

Ajisüaka iba asaya akokba shi Poland tsür aser French Open champion Swiatek ya taküm agi kümnabuba temaba jenjang nung küm tembangtsü asoshi maongka lir. Lai final nung America tsür Pegula kokra temaba jenjang nung tembangtsü.

"Asayamung akoktsü atema talangka pila lir ama bilemer, kechiyong final asaya ya

tasakba asütsü ta bilemer. Asüng asayaba sülenang jembidi. Ni kechi koda asaya aru yamaji dang asayatsü," ta Swiatek-i ashi.

Sabalenka-i ita ana tejakdang Swiatek ajateta temaba jenjangi atu ajisüaka Pegula-i final akok nungdang la temaba jenjang nung küm tembangtsü.

Kasa mapang nung Pegula-i Honibarnü külem America tsür Coco Gauff 6-2, 6-1 agi koka WTA Finals nung championship atema asayatsü asoshi maongka ngutetogo.

Swiatek aser Pegula na tang tashi nung ti ben asaya lir koba Swiatek-i 5 ben aser Pegula-i 3 ben koka lir, ajisüaka America tsür la yagi tena taküm asem ben asayaba anabenbo kokogo. Pegula-i United Cup aser August ita Montreal asayamung semifinal nung Swiatek kokogo. Swiatek-ia taküm Doha final nung Pegula kokogo.

Brazil aser England na Wembley nung Friendly ka asayatsü

Yimpoksüi/November 6, 2023 (Agencies): Brazil football confederation-i sangdong ka ajanga national team taruba küm March ita England den Wembley nung friendly ka asayatsü ta sangdongogo.

Iba asaya ya England team asoshi küm trok tsüngda South American team ka den mezüngbuba asaya asütsü. Team ana ya tesüsa 2017 küm asaya, koba telok kati danga goal magütsüteti tembanga

liasü.

Brazil-isa, March ita Spain den friendly ka asayatsüba osang sangdongogo. South American national team temi Europe nung aliba team tem den asaya-a parnok team tendangtsü asoshi mapang manguba atema ashishia aruogo.

"Onok nukjidongji Brazil national team taoba mapang world champion tem den asayatsü asoshi lir, ajita asünungdang temaba jenjang

nung asayaba asaya nung onok shilem agitetsü," ta linük football confederation-i Hombarnü sangdong ka ajanga metetdaksü.

Maneni Brazil team November ita World Cup qualifying ana asayatsü lir. Parnok mezüngbuba Colombia den asayatsü aser tanabuba asaya Rio de Janeiro kübok Maracana Stadium nung defending champion Argentina den asayatsü.

Hockey: India tetsür team Paris Olympics atema qualifier asayatsü

Yimpoksüi/November 6, 2023 (Agencies): India tetsür Hockey team Paris Olympics asoshi Germany, New Zealand, Japan, aser USA nung amala team tem den tokteptsü ta iba asaya achaayangba lokti tenteti FIH Hockey Olympic Qualifiers 2024 atema Hombarnü team tem sangdongogo mapang metetdaksü.

Savita Punia-i aniba team ya tawa asayaba Asian Games nung semifinal nung tsükatokba ajanga Olympics atema qualify mesütet. Iba asayamung nung Hockey asaya ya China-i akok aser

parnok taruba küm Olympics atema qualify süogo. Tetsürtem atema qualifying asayamung anarongnung ka China nung asayatsü liasü saka iba asayamung ya Ranchi-i belenogo.

India tetsür team-i Deobarnü Asian Champions Trophy koka liasü aser tang parnok qualifier dak rangloker asayatsü nungdaker, koba 2024 küm January 13 nungi 21 tsüngda asayatsü.

Tetsür team ti ya Ranchi nung Olympic quota asem atema asayatsü, kong world No 5 Germany, No 6 India, No 9 New Zealand, No 11 Japan,

No 14 Chile, No 15 United States, No 19 Italy, aser No 25 Czech Republic densema lir.

Team ti ya telok ana küma lemsar asayatsü. Asayamung indang format ya FIH Nations Cup nung amshiba ama dang asütsü, kong team pezüzü agi kümtetba telok ana alitsü aser telok anaprongla nungi temaba jenjang nung tembangba team ana semifina-i aitsü aser iba sülen tasembuba jenjang asoshi playoff aser final asayatsü.

Asayamung anaprongla nung temaba jenjang nung tembangba team asem nem NOC atema quota agütsütsü.

BILEMDANGANG

"Teyari aginüra teyari agütsütsüla."